

## Konsultá ku un Astrólogo Parasikólogo?

Bo tin gana di sa kiku ta bai pasa otro año? Awor bo (supuestamente) por haña sa, serka e astrólogo parasikólogo, William Ramy, ku ta bishitá nos isla.

Segun Ramy, el a pronostiká ku Bill Clinton di Merka, Alberto Fujimori di Peru, i Joaquin Balaguer di Repùblika Dominikana lo gana e último elekshonnan presidensial na nan paisnan respektivo.

I relashoná ku e futuro di nos isla, e astrólogo a pronostiká ku 1995 lo bira un año hopi bon pa Boneiru riba tereno ekonómiko. Lo bin mas empresa, mas hotèl, mas avion, mas turista, i mas trahadó estranhero. "Lo tin hopi trabou i plaka, tresiendo felisidat." E tambe ta pre-mirá algun problema relashoná ku e desaroyo ekonómiko: mas prostituta, mas narkotráfiko, i mas labamentu di plaka den institutonan bankario riba nos isla. I di e elekshon insular di otro año, señor Ramy a predís ku e gobièrnu aktual lo keda ounke por tin algun kambio chikitu. E tambe a deklará ku Jean Bertrand Aristide, presidente di Haiti, lo no terminá año 1994 bibu.

Ma promé ku bo ta kanta tayer den bo antóho pa sa bo futuro dor di konsultá ku e astrólogo aki, para un ratu i pensa.

Ripará ku e pèrsona aki, ku ta pretendé ku e tin e abilidad pa mira fenómeno fuera di loke ta natural, no a pronostiká nada ekstraordinario. Kualke persona ku tin un tiki sintí tambe por "pre-mirá" e kosnan aki. Ya kaba ta eksistí un bon chens ku e pronostikashonnan aki lo sosodé...tin sikiera 50% probabilidad. Ademas, ku eksepshon di e pronostikashon tokante Aristide, poko ta spesífiko: poko sifra, poko nòmber, poko fecha, poko sitio. Ta muchu mas fásil pa un pronostikashon general sosodé ku un pronostikashon spesífiko.

Ramy ta propagá su tres pronostikashon korekto; ma e no ta laga sa kuantu biaha el a kiboká. Ma asta si 99 di 100 pronostikashon a resultá—loke lo ta sumamente asombrante—Beibel tòg ta kondena'è. Palabra di Dios ta insistí ku un bèrdadero profeta mester ta 100% korekto. "Ora un profeta papia den nòmber di SEÑOR i si e kos no sosodé ni bira realidat, esei ta loke SEÑOR no a papia. E profeta a papi'è ku tribilidad. No tene miedu di dje" (Deuteronomio 18:22).

Ma fuera di esei, nos tin masha problema ku astrologia i su produkto favorito, horoskop. Ramy ta deskribí astrologia komo un "siensia" basá riba fecha, dia, i ora di nasementu di un pèrsona, ku influensianan astral. Ma ta puru mentira pa yama astrologia un siensia. Algun año pasá, 186 sientífko renombrá a deklará: "Ta tempu pa ataká energétikamente i na un forma direkto e pretenshonnan di e charlatannan astrológiko. Ta simplemente un eror pa imaginá ku streanan i planetanan na momentu di nasementu tin poder pa afektá nos future di kualke forma."

Astrologia tin hopi otro problema. E ta pone mundu na sentro di nos sistema solar na lugá di solo. Segun astrónomonan (sientifikonan bèrdadero), horoskopnan awendia ta 30 dia atrasá den nan pronostikashonnan. Astrólogonan ta tene kuenta ku solamente 12 konstelashon den nan zodiak, ignorando e konstelashonnan den nos galaksia ku a ser deskubrí despues ku nan a invent zodiak. Pronostikashonnan astrológiko ta varia di un pais pa otro, debí ku nan ta usa otro signo.

Dios ta deklará kategoriakmente: "No laga tin meimei di boso...ningun ku ta praktiká adivinashon, òf ku ta hasi bruha, òf ku ta pronostiká, òf ku ta praktiká magia...Pasobra ken ku hasi e kosnan aki ta un abominashon na SEÑOR" (Deuteronomio 18:10,12). Ademas, Beibel ta bisa nos pa no"...spanta pa e señalnan di e shelunan..." (Jeremias 10:2). Streanan i planetanan no ta determiná bo futuro; Dios ta Esun ku ta hasi esei. I Dios a dunábo e libertat pa skohe bo DESTINO ETERNO. Ningun strea òf planeta por skapábo di un destino na fièrnu. Solamente Kristu por hasi esei.

No kanta tayer den bo purá pa konsultá ku un astrólogo parasikólogo. Sano huisio, siensia bèrdadero, i Skritura santu ta kondena astrologia i horoskop. Konfia Kristu pa bo futuro—awor i pa eternidat, i laga outo keda stashoná trankil unda e ta.